

**Date – 17/12/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Kum 2025 atanga kal pui tur Chief Minister’s Rubber Mission chu nimin khan Chief Minister Pu Lalduhoma’n Dawrpui Multipurpose Hall ah a hawng.**
- 2. Tlaizawng leh Khawpuitan Hapta chu vawiin atang hian Chawngtlai khuaah hman a ni ang.**
- 3. 'Fit India Cycling Tuesdays' chu vawiin atang hian rampumah kalpui tan a ni.**
- 4. India leh Sri Lanka chuan chhiah lak thuah pumpelh dan tur leh vantlang ram chhiah lak a invenna tur a inremna siam tha in an sawi dun.**

<><><>

**CM RUBBER**

**Kum 2025 atanga kal pui tur Chief Minister’s Rubber Mission chu nimin khan Chief Minister Pu Lalduhoma’n Dawrpui Multipurpose Hall ah a hawng.**

**Chief Minister chuan he Rubber Mission hian Mizoram chhunga Rubber tharchhuah leh hralhchhuah hmanga state Economy chawikan leh hnathawh tur siam chu a tum ber a nih thu a sawi a. Mizoram a kut hnathawktu leh chhungkua te’n eizawna ngialnghet an neih theihna tur a ni tih sawiin; vawiin a bul an tan hi nakin a an that pui tur a ni a ti a, thlai hrang hrang chin thlawn leh hah thlawn pui kan nei teuh tawh avangin, kawng engkimah inrintawk lohna kut hnathawktu te thinlungah a awm a ni a ti a; rubber erawh a hralh chhuah kawngah engmah hlauhthawna tur a awm lo a ni a ti.**

**He pilot project hi cluster based a kalpui tur niin, Chhungkaw khat zelah hectare khat zel anga kalpui tur a ni a, Pilot project hnuai a rubber ching tura thlanchhuah te chuan hamthatna hrang hrang an hmu dawn a ni.**

**He hunah hian Mizorama rubber chin kawnga hma lo la nasa tawh leh chawi lar tawh, Rubber chingtu entawn tlakte hnenah chawimawina Incentive cash award hlan an ni. He hun hi, Land Resources, Soil & Water Conservation Minister Pu Lalthansanga chuan a hman pui bawk a ni.**

<><><>

**MIC**

**Mizoram Information Commission chuan Mizoram RTI Online-a State Public Information Officer (SPIO) la in register lo department hrang hrang 11 hotute chu Chief Information Commissioner Pu John Neihlaia leh Information Commissioner Pu Mangjangam Touthang, hmaa inlan turin a ko a.**

He hunah hianin Head of Department leh Senior Officer engemaw zat inlanin RTI Online-ah an department SPIO la in register lote in register ngei a tul thu hrihhriat an ni a, department hotute pawh hian a hma thei ang bera MIC thuchhuak hi zawma hma lak an tum thu an sawi a ni.

Vawiin hian department 16 dang hotute MIC-a inlan leh tura hriattir an ni.

Mizoram RTI Online hi July ni 1, 2022 khan hman theih turin hawn a ni a, General Administration Department chuan July ni 22, 2022 khan hriattirna tichhuakin Departmental Appellate Authority (DAA), State Public Information Officer (SPIO) leh State Assistant Public Information Officer (SAPIO) te he portal-a August ni 22, 2022 aia tlai lova in register turin a lo ti tawh a. August 21, 2024 khan Mizoram Information Commission chuan September ni 15, 2024 ral hmaa in register vek turin thuchhuah a lo siam tawh bawh a. La in register lo hriatchhuah te chu CIC hmaa an inlan tura koh a nih tur thu hriattir an nih angin Mizoram Information Commission chuan hma a la ta a ni.

<><><>

#### HYBRID SOLAR DRYER

GITAM University, Visakhapatnam chuan Horticulture leh Rural Development Department in an mamawh anga an hman turin ‘Hybrid Solar Dryer with Automated Temperature Controller Technology’ chu nimin khan Minister Prof. Lalnilawma hnenah an hlan.

Horticulture Minister Prof. Lalnilawma chuan Mizorama kuthnathawktute thlai thar chhuah sawngbawl nana pho ro leh rep ro nan hun, sum leh tha tam tak sen ral a nih thin thu sawiin Hybrid Solar Dryer Technology hmangin an harsatnate sutkian theih a nih a rin thu a sawi a. Horticulture department hnuai a Mission for Integrated Development of Horticulture chak lehzual a kalpuina tur hmanraw tangkai a nih ngei a beisei thu a sawi. Kuthnathawktute tihhmasawn duhna avang GITAM University leh Technology Enabling Centre, Mizoram University-te inpekna chu lawmawm a tih thu Minister chuan sawiin ramin hmasawna kawng a zawh zel theihna turin thawhho chhonzawmpui ah a sawm nghal a ni.

GITAM University aiawh a lo kal te chuan he thiamna hi kuthnathawktute tih hmasawna tur a hmalakna a nih thu leh Mizoramin hmasawna kawng chak lehzuala a zawh theih nan a thlawnin an pe tih an sawi.

<><><>

#### CHERRY BLOSSOM

Tlaizawng leh Khawpuitan Hapta chu vawiin atang hian Chawngtlai khuaah hman a ni dawn a.

Chawngtlai khua hian kum 2016 atang khan Tlaizawng Park lo siam tawhin, kumin hian a vawi khat nan Tlaizawng hapta hi an buatsaih a,

Tlaizawng haptaah hian Tlaizawng kunga dawh ngei leihkapui photo booth engemaw zat a awm dawn a, tlawhtute leh thlalak lama tuimi te tan a man hla hle tur a ngaih a ni.

Hei bakah hian Adventure lam tui mite tan Mizo history a hmun pawimawh tak luahtu, Khawpuitan tlangdung feet 5600 chuang a sang, kilometre 5 dawna thuih Trekking Route mumal tak siam a ni a, khamchhengchhe tak tak leh khambang tial mawi tak takah te trekking tiin a chet tlat theih dawn a ni.

Voicecast...Khawzawl PTC

*(Tlaizawng leh Khawpuitan Hapta chu Chawngtlai khuaah hmang turin inbuatsaihna peihfel thawkhat tawh a ni a, hei hi Mizorama vawi khatna tur niin December ni 23 thleng neih tura ruahman a ni.*

*Chawngtlai khuaah hian khualzin mite tan hmun nuam tak tak siam a ni a, intihhlimna Carnival leh Stall hrang hrang siam niin hmun nuam tak tak buatsaih a ni bawk.*

*Chawngtlai hi kum 2014 khan Mizo Historical village a lo vuah tawh niin Khawzawl District chhunga awm a ni a, Mizo Historical Village a nih angin Mizo Pipute sulhnu leh hmun hlui tam tak hmuh tur a awm a ni.*

*Lalsangpuii Akashvani News Khawzawl)*

<><><>

CONSTITUTION

Govt Mizoram Law College Principal Dr Esther Chhangte chuan hnamdang leh hmundanga chengte hmuh theihah Mizote inphochhuah thiam a pawimawh a ti a, hnam thilung put a pawimawh tih sawiin Mizo tih hming chu theh lar zual a pawimawh a ti.

He thu hi India danpui chungchang sawihona Akashvani News in a buatsaih ah sawiin Dr Esther Chhangte chuan Mizote chu hnamdang hmuhah inphochhuah tam a ngai a ti a, Mizo nih hlutna chu thang thar ten an hriat tam a pawimawh tih sawiin hmun danga cheng te pawhin Mizo nihna vawn nun zel a pawimawh tih a sawi.

Law College Principal sawi danin sawrkar laipuiin Uniform Civil Code thar thawh tum mahse Mizote humhimna tur atana duan Article 371G hmangin venhimna tha tak an nei a ti a, venhimna awm mahse enfiah ve reng an ngai tih sawiin dan hmanga inhumhimna awm mahse Mizoram chu Uniform Civil Code pawhin a nghawng thei tho tih sawiin mahni inhai kuak thiam a, mahni himna hrechiang turin mi tin te a chah a ni.

Kum 75 chhunga India danpui dinhmun leh pawimawhna chungchang sawihona hi Akashvani News chuan naktukah tihchhuah a ni ang.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve ah Chanchinthar hi puan leh a ni ang.

<><><>

#### FIT INDIA

Union Minister of Youth Affairs and Sports, Dr. Mansukh Mandaviya chuan vawiin hian New Delhi-ah 'Fit India Cycling Tuesdays' a hawng dawn a. Sports Authority of India (SAI) Regional Centre hrang hrangah te cycling event buatsaih nghal a ni ang.

Mizoram ah pawh he event hi SAI, STC Aizawl leh SAI Extension Centre, Thenzawl te thawk ho chuan Mizoram Cycling Association leh Thenzawl Cycling Association te nen tangkawpin buatsaih a ni ang a. Aizawl-ah chuan Vanapa Hall atangin Cyclist te chu tlan tir an ni ang a, Chanmari thlengin an tlan dawn a, Vanapa Hall-ah bawk kir lehin km 5 an tlan ang. Thenzawl-ah chuan Thenzawl Football Field atangin tlan tir an ni ang a, Golf Course-ah tawpin km 10 an tlan thung ang. He event-ah hian Mizoram aiawh athlete te bakah tualchhung mi, infiamna ngaina mite an tel dawn a ni.

Fit India Cycling Tuesdays Hawwna neih zawh hnu hian, ram pumah Thawhlehi apiangin cycling event hi neih chhonzawm zel a ni ang.

<><><>

#### CYMA

Mizoram Synod chuan Kum 1936-1954 chhunga Kristian Tlangau bu a, YLA/YMA thubelh ti a YLA/YMA chanchin chhuah tel ve thin chu a hlawm a hmun khat a dah khawm in Central YMA hnenah nimin khan an hlan.

He hunah hian, Pu Kennedy Lalhmangaiha, Archivist in report pe in, Central YMA in a ma puala chanchinbu a neih hma Kum 1936-1954 chhung khan Kristian Tlangau ah hian YLA/YMA thubelh tiin, YMA chanchin chhuah thin a ni a, hengte hi Central YMA in a copy an dil chu Synod Archives Committee chuan rem tiin vawiin khan hlan an ni a, a vaiin pheik 1524 zeta chhah a ni.

Central YMA aiawh a thusawitu Prof Malsawmliana General Secretary chuan Synod Archive in uluk taka an lo vawn that YMA chanchin chhui letna atan a tangkai tak tur vawiin a hlan a ni chu lawmawm a tiin, phal taka hlantu Mizoram Synod chungah lawmthu a sawi a, hei hi YMA history tam tak tarlanna pawimawh tak a nih avangin YMA tan chuan a hlu tak zet a ni a ti.

<><><>

**AR**

**Vijay Diwas pualin nimin khan Assam Rifles chuan Farkawn Higher Secondary School ah drawing competition an buatsaih a, Vijay Diwas chungchang inzirtirna an huaihawt bawk a ni.**

**He inelnaah hian naupang 48 an tel a, kum 1971-a India-Pakistan Indonaa ram sipai huaisen te inpekna chungchang an zirtir a ni.**

**<><><>**

**INDIA/SRI LANKA**

**India leh Sri Lanka chuan nimin khan chhiah lak thuah pumpelth dan tur leh vantlang ram chhiah lak a invenna tur a inremna siam tha in an sawi dun.**

**Sri Lanka a vantlang mite leh an chen theih zat chungchang ah pawh Inremna an ziak dun bawk. Ram hruaitu 2 Prime Minister Narendra Modi leh Sri Lanka President Anura Kumara Dissanayake te chuan New Delhi ah ram 2 te tan a inbiakna an neih hnu ah inremna thuthlung an ziak dun a ni.**

**Hemi pual hian Maho-Anuradhapura a signaling project tan cheng dollar maktaduai 14.9 chu tanpuinan a hlan nghal a, university of Jaffna leh Eastern University a zirlai thar mi 100 tan tanpuina tur scheme a puang bawk. Hruaitu pahnih te hian inpawhna leh inzawmna thuk zawk a awm zel theih nan minister level a inzawmna siam zel an rem ti a ni, ram 2 a mithiam te inrawn fo tha an tih thu an sawi bawk.**

**<><><>**